

Održana 31. sjednica Općinskog vijeća Ilijaš

27. maja 2015. godine održana je 31. sjednica Općinskog vijeća Ilijaš s Dnevnim redom od 6 tačaka.

Nakon usvajanja Zapisnika sa prethodne sjednice i Dnevnog reda, vijećnici su jednoglasno usvojili i Zaključak o ponovnom podnošenju tačke na Dnevni red prije isteka roka od 6 mjeseci, a to je Izvještaj o radu Pravobranilaštva Kantona Sarajevo za Općinu Ilijaš za 2014. godinu, koji se našao na trećoj tački Dnevnog reda i jednoglasno je usvojen.

U okviru vijećničkih pitanja i inicijativa vijećnici su postavljali pitanja o aktuelnim problemima, upućivali inicijative nadležnim institucijama iz oblasti zdravstva, infrastrukture, zaštite voda.

Na četvrtoj tački Dnevnog reda našao se Prijedlog Odluke o davanju saglasnosti za zaključivanje ugovora o zajedničkoj gradnji nadziđivanjem. Ovom Odlukom daje se saglasnost za zaključivanje Ugovora o zajedničkoj gradnji nadziđivanjem između Općine Ilijaš i JU Dom zdravlja Kantona Sarajevo, kojim će se ugovarači obavezati da zajednički realizuju projekat "Rekonstrukcije, nadziđivanja, izmjene elemenata i materijala vanjskog izgleda fasade" kroz zajedničku gradnju dvije etaže nad postojećim objektom Doma zdravlja u Ilijašu i jedne etaže nad postojećim objektom Općine Ilijaš. Realizacijom ovog Projekta Općina Ilijaš će dobiti dodatna 84,21 m² prostora.

Obrazloženje Informacije o izvršenju Budžeta Općine Ilijaš za period 01.01.-31.03.2015. godine dala je Pomoćnica Općinskog načelnika u Službi za privredu, finansije i investicije Općine Ilijaš, g. Merima Osmanović i istakla da je: "Budžet općine Ilijaš u periodu 01.01.-31.03.2015. godine bilježi 2.153.757,00 KM ostvarenih prihoda, što je 24% od planiranih prihoda u Budžetu za 2015. godinu. Sa druge strane, ostvareni su izdaci u iznosu od 1.818.420,00 KM, što predstavlja 20% od planiranih izdataka u Budžetu za 2015. godinu. Prema tome, ostvaren je suficit za navedeni period u iznosu od 335.337,00 KM".

Na ovoj sjednici posebnu pažnju vijećnika privukla je informacija iz oblasti šumarstva i eksploatacije kamena. Vijećnici su prisutnim predstavnicima Uprave za šumarstvo i JKP "Sarajevo šume" postavljali pitanja u cilju zaštite šuma, lokalnih puteva prilikom eksploatacije, te se i Općinski načelnik g. Akif Fazlić obratio po ovoj tački, rekavši da: "je ovo jako važna materija za lokalnu zajednicu i drago mi je da vijećnici ozbiljno shvataju ovu problematiku. Imamo dva interesa kada je u pitanju ova oblast. Prvi je zaštita šuma kao prirodnog bogatstva a drugi funkcija i rad JP koji obavljanjem svoje djelatnosti obezbjeđuju zapošljavanje kadra pa do proizvodnje. Bitno je sagledati oba segmenta i zadovoljiti oba interesa".

Općinski načelnik je predložio Općinskom vijeću i da usvoje a potom i upute nadležnim institucijama dva Zaključka i to:

1. Da se u Operativnom planu korištenja sredstava Ministarstva privrede Kantona Sarajevo prioritet da Projektima rekonstrukcije i modernizacije puteva na područjima vezanim za eksploataciju šuma; i
2. Prioritet u prodaji drvnih sortimenata pod jednakim uslovima dati proizvođačima sa područja Kantona Sarajevo u cilju stvaranja uslova za povećano zapošljavanje u Kantonu Sarajevo.

Oba Zaključka su dobila jednoglasnu većinu, te je i Općinsko vijeće predložilo i usvojilo još dva Zaključka koja će Služba uputiti nadležnim institucijama i to:

1. U cilju zaštite lokalnih puteva od interesa za Općinu Ilijaš da Služba za prostorno uređenje i stambeno-komunalne poslove Općine Ilijaš izvrši postavljanje vertikalne signalizacije u smislu zabrane kretanja šlepera i prikolica koje vrše prijevoz balvana; i
2. Zadužuje se JP "Sarajevo šume" da odrede lokaciju za utovar i lagerovanje

balvana kako bi se izbjegao utovar i lagerovanje na saobraćajnicama.